



Ustrajnost u dobrim djelima (Meka)

Hatib: dr. Bender ibn Abdulaziz Belile

6. ševal 1446. po Hidžri / 4. april 2025.

Hvala Allahu, Koji daruje i obasipa blagodatima, i upućuje ka najispravnijem putu. Zahvaljujemo Mu se, slavljen neka je On, na obilnim darovima i mnogobrojnim blagodatima, i zahvalni smo Mu uvijek, u svakom stanju, vremenu i okolnostima. Svjedočim da nema istinskog boga osim Allaha, jedinog, Koji nema sudruga. Odabrao nas je kao najbolji ummet, među ostalim ummetima, i počastio nas Svojim najboljim Poslanikom, savršenog ahlaka i visokih manira. Neka su Allahova milost, blagoslov i spas na njega, na njegovu porodicu i njegove ashabe, ljude vrline i odlučnosti.

Savjetujem sebe i vas, o ljudi, da se bojimo Allaha. Bojte se Allaha, Allah vam se smilovao. Znaite da se "sezona" dobra nikada ne završava, niti prestaje vrijeme približavanja Allahu. Iako smo prije nekoliko dana ispratili jednog od najčasnijih gostiju, najdarežljiviji mjesec u godini, prilike se i dalje nižu, vrata hajra se ne zatvaraju, a dobra djela ne prestaju. Ima li koga ko bi s jednakom čežnjom i poletom nastavio s činjenjem dobra?

O vjernici, ramazan je stanica za opskrbu, škola promjene, kapija pokreta. Polja dobra širom su otvorena, i svi oni ibadeti koje smo praktikovali kao takmičenje u ramazanu ostaju prisutni i izvan njega. Ustrajnost u ibadetu i kontinuitet u pokornosti nešto je na što islam podstiče, i na što Kur'an ukazuje, a Poslanik, sallallahu alejhi ve sellem, bio je postojan u tome. Uzvišeni kaže: "Koji molitve svoje budu na vrijeme (ustrajno) obavljali." (El-Mearidž, 23)

Buhari i Muslim bilježe od Aiše, radijallahu anha, da je upitana: "O majko pravovjernih, kakvo je bilo Poslanikovo djelo? Da li je posebno izdvajao neke dane?",





na što je odgovorila: "Ne, njegovo djelo bilo je konstantno. A ko od vas može izdržati ono što je Poslanik mogao?"

Čak i kad je djelo malo, i dobročinstvo neznatno, bolje je od velikog djela koje nema kontinuitet. Buhari i Muslim od Aiše, radijallahu anha, bilježe da je Poslanik, sallallahu alejhi ve sellem, rekao: "Allahu najdraža djela su ona koja su stalna, makar ih bilo malo." I rekao je: "Radite djela koja možete podnijeti."

Nevevi, Allah mu se smilovao, rekao je: "To znači: Onoliko koliko možete činiti ustrajno, bez štete. U tome je dokaz da se podstiče na umjerenost u ibadetu i izbjegavanje pretjerivanja. Mala i malobrojna djela koja imaju kontinuitet bolja su od velikih i mnogobrojnih djela koja nemaju kontinuitet. Ustrajnost u činjenju malih i malobrojnih djela održava kontinuitet ibadeta, i količinski značajno nadilazi velika i mnogobrojna djela, u kojima se ne ustrajava."

Ustrajnost u malim i malobrojnim djelima čuva čovjeka od dugog prekida. Rob je ili u napredovanju ili u nazadovanju, uvijek je u hodu i nikad se ne zaustavlja. Uzvišeni kaže: "... onome između vas koji želi učiniti dobro (ići naprijed) ili onome koji ne želi! (koji želi nazadovati)." (El-Muddessir, 37)

Najbolje čime čovjek može nastaviti svoja dobra djela nakon ramazana jeste post šest dana mjeseca ševala, uzastopno ili razdvojeno. Muslim bilježi od Ebu Ejuba el-Ensarija, radijallahu anhu, da je Poslanik, sallallahu alejhi ve sellem, rekao: "Ko isposti ramazan i šest dana ševala, kao da je postio cijelu godinu."

Blago onome ko je ramazan uzeo kao početak putovanja prema Milostivom, i učinio sve svoje dane sredstvom približavanja Džennetu.

O vjernici, kada Allah želi dobro Svom robu, učvrsti ga na putu pokornosti, zasadi u njemu istinsku postojanost, otvori mu vrata dobra i olakša puteve ibadeta. Ibn Kajjim, Allah mu se smilovao, rekao je: "U trenucima slabosti, koji zadese putnike na Allahovom putu, razotkrije se ko je iskren, a ko lažac: lažac se vraća svojoj prirodi i strastima, dok iskreni čeka olakšanje (izlaz), ne gubi nadu u Allahovu milost, i baca





se pred vrata Allaha skrhan i ponižen, poput prazne posude. Ako vidiš da te Allah postavio u ovu poziciju, znaj da želi da ti se smiluje i napuni tvoju posudu.”

A, jedno od najvećih pomagala robu da ostane ustrajan jeste dova Allahu, Uzvišenom. On je obećao da će se odazvati. Uzvišeni kaže: “A kada te robovi Moji za Mene upitaju, Ja sam, sigurno, blizu: odazivam se molbi molitelja kad Me zamoli. Zato neka oni pozivu Mome udovolje i neka vjeruju u Mene, da bi bili na Pravome putu.” (El-Bekara, 186)

Jedna od dova koje je Poslanik, sallallahu alejhi ve sellem, često učio bila je i dova za postojanost. Imam Ahmed i Tirmizi bilježe hasen hadis od Enesa, radijallahu anhu, koji je rekao: “Poslanik, sallallahu alejhi ve sellem, često je govorio: ‘O Ti Koji okrećeš srca, učvrsti moje srce u Svojoj vjeri!’, pa sam rekao: ‘O Allahov Poslaniče, mi vjerujemo u tebe i u ono s čim si došao, zar i za nas strahuješ?’ Na to on reče: ‘Da. Jer srca su između dva Allahova prsta, okreće ih kako želi.’”

Donosite salavate i selame, Allah vam se smilovao, na najbolje Allahovo stvorenje, Muhammeda, sina Abdullahovog, jer vam je to naredio vaš Gospodar riječima: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

